

19 JAN 2004

MAHATHIR-WTO/I

MAHATHIR INGATKAN TENTANG BAHAYA TERGESA-GESA SERTA WTO

Oleh: Shakir Husain

DUBAI, 19 Jan (Bernama) -- Bekas Perdana Menteri, Tun Dr Mahathir Mohamad, mengingatkan negara-negara tentang bahaya menyertai Pertubuhan Perdagangan Dunia (WTO) secara tergesa-gesa.

WTO dikuasai oleh negara-negara yang kuat dan tidak memikirkan kepentingan negara-negara membangun, kata Dr Mahathir kepada Saudi Arabia dan negara-negara lain yang berhasrat menyertai badan perdagangan itu.

Bercakap pada satu persidangan ekonomi di Jeddah, Ahad, beliau berkata, "Semua orang harus berhati-hati tentang menyertai WTO, kerana bukan semuanya positif, ada agenda-agenda tertentu dirangka oleh negara-negara maju dan ternyata WTO memberi tumpuan kepada agenda-agenda ini," kata Mahathir pada Forum Ekonomi Jeddah menurut sebuah laporan dalam akhbar Saudi Gazette, Isnin.

"Pada masa ini, secara bersendirian. negara-negara miskin tidak berupaya memajukan agenda. Tetapi, sebelum menyertai WTO, mereka harus duduk berbincang bersama dan memajukan agenda mereka sendiri serta bersuara dengan satu nada," tegas Mahathir.

Menyentuh tentang cadangannya supaya dinar Islam bersandarkan emas dijadikan matawang perdagangan dunia Islam, Mahathir berkata, negara-negara Islam, khususnya yang mengeksport minyak, akan mendapat faedah kerana ia akan melindungi mereka daripada keadaan turun naik nilai dolar Amerika.

Pengeksport minyak yang berniaga dalam nilai dolar kini menerima nilai pertukaran yang "kurang" kerana matawang itu telah kehilangan 33 peratus daripada nilainya berbanding euro.

Jika minyak dijual dengan matawang bersandarkan emas, pendapatan tidak akan terjejas oleh faktor-faktor politik dan sosial yang boleh menyebabkan matawang susut nilai.

"Dinar bersandarkan emas sebenarnya merupakan urusan niaga emas dan akan menstabilkan perdagangan di peringkat antarabangsa," tegas Mahathir.

Ucapan bekas Perdana Menteri itu bertajuk "Resipi Pertumbuhan dari Malaysia: Wawasan 2020".

Mahathir menceritakan kepada forum itu bagaimana Malaysia bangkit daripada sebuah negara miskin tetapi kaya dengan sumber menjadi sebuah negara pengeluar teknologi tinggi. -- BERNAMA

SH PK KTC KY AA